

## *Nuusbrief van die Peter Henrich Henning Familiebond*

Theewaterskloof Landgoed  
Villiersdorp

Posbus 121  
6848 Villiersdorp

Sel: 082 355 3801

[www.henning.org](http://www.henning.org)

E-pos: [olie4@henning.org](mailto:olie4@henning.org)

*Verskyn vier keer per jaar: Februarie, Mei, Augustus en November*

## Oorlogsmuseum se 90 jaar met kunswerk gevier



**Tokkie Pretorius, direkteur van die Oorlogsmuseum, saam met Nannie Henning by die kunswerk wat sy in opdrag van die museum vir sy 90ste verjaardag geskep het**

Die oorlogsmuseum van die Boererepublieke in Bloemfontein het met sy 90ste verjaardag op 30 September 2021 'n kunswerk onthul wat die museum se drie aanbouingsfases deur die jare uitbeeld.

Die museum het sy deure in 1931 as 'n klein eenvoudige gebou vir die publiek geopen. Dit was nadat die Nasionale Vrouemonumentkommissie

oor die jare na die onthulling van die Vrouemonument in 1913 toenemend meer Anglo-Boereoorlog-artefakte van die publiek gekry het.

Dit het gelei tot die gedagte om 'n spesiale gebou digby die monument op te rig waar al sulke voorwerpe versamel, bewaar en vertoon kon word.

Die gebou, waarvan die hoeksteenlegging op 26 April 1930 plaasgevind het, is danksy bydraes deur die publiek opgerig.

Senator W J C Brebner, lid van die Nasionale Vrouemonument-kommissie, het die hoeksteen in die teenwoordigheid van 'n groot skare gelê, onder wie talle leerlinge van die Hoër Meisieskool Oranje.

Die gebou heet sedert 4 Junie 1930 die Oorlogsmuseum. Dit is einde Julie 1931 voltooi en die museum se werksaamhede het in September daardie jaar met drie personele begin. Vandag werk daar 26 mense.

**In ou Baltiese dialek was Hen = Haan (manlik), Henne = Hen (vroulik). Henning = Haantjie (vriendelike bynaam vir 'n jong lewenslustige en parmantige seuntjie)**

Dié kommissie het voor die museum se amptelike opening ‘n landwyse oproep om skenking van voorwerpe uit die oorlog gedoen en het ook vanuit Nederland en Duitsland artefakte gekry.

“Die museum speel ‘n belangrike rol in nasiebou, versoening en veral sosiale kohesie”, sê Tokkie Pretorius, die museum se vyfde direkteur, oor die museum se hedendaagse rol.

Dit is nou ‘n inklusiewe Suid-Afrikaanse museum. Dit is oor die afgelope dekade van ‘n Afrikanermuseum in ‘n Suid-Afrikaanse museum omskep. Die pyn wat die oorlog veroorsaak het, is universeel en die museum dra nou ‘n universele boodskap uit.

Nannie Henning, ‘n Bloemfonteinse waterverfskilder het die kunswerk van die drie aanbouingsfases in opdrag van die museum gedoen. Nannie se volledige name in die Henning Familiiekroniek is **Elizabeth Magrietha Henning (gebore Ackerman) \*26-9-1947 en sy is die eggenote van wyle a2.b6.c1.d3.e5.f11.g6. Douw Gerbrand Henning \*18-4-1948.**

Nannie moes van foto’s af werk, waarvan een in swart en wit en ‘n ander net ‘n lyntekening was. Sy skilder oor die algemeen landskappe en blomme.

Nannie sê dat dit ‘n groot maar lekker uitdaging was om die werk te skilder, omdat dit argitektonies korrek moes wees. Dit sal in die museum vertoon word.

**Die Henning Familielbond is natuurlik baie trots daarop dat die famielbond oor die afgelope elf jaar betrokke kon wees by verskeie projekte by die Oorlogsmuseum, onder andere die oprigting van ‘n Konsentrasiekampmonument gedurende 2010; die Gedenkmuur van gesneuwelde burgers in 2012; die eeufeesvieringe van die Vrouemonument in 2013 en die bewaring van die pediment van die Vierde Raadsaal van die Volksraad van die Republiek van die Oranje Vrystaat in 2015.**



**Die gedenkplaat by die Konsentrasiekampmonument by die Oorlogsmuseum, Bloemfontein waar erkenning gegee word aan die Henning Familielbond se bydrae tot die oprigting van die monument.**

# **“BEHOLD A MAN” Andries Gerhardus Henning**

Die “Bloem Snippets” E-Nuusblad van 4 November 2021 wat in Bloemfontein versprei word het ‘n berigie op sy voorblad oor a2.b6.c1.d3.e4 Andries Gerhardus Henning, gebore 31 Oktober 1859 gedra.



**a2.b6.c1.d3.e4 Andries Gerhardus Henning, gebore 31 Oktober 1859 en sy vrou, Hannie. Hy het as ‘n Kaapse-rebel aan die Anglo-Boere-oorlog deelgeneem. Die regter wat sy vonnis moes hersien, het hom as ‘n uiters eerbare man beskryf toe hy hom vrygespreek het**

Ons glo dat die skrywer van die artikel, Ronel Theart insae in die Henning Familiekronek moes gehad het, omdat haar gegewens grootliks ooreenstem met dít wat ons reeds aangeteken gehad het. Sy het egter een baie interessante punt bygevoeg, wat ons nie oor beskik het nie, nl ‘n opmerking deur die Britse regter wat Andries Henning uiteindelik vrygespreek het van die boete van £9 000 wat hom opgelê is.

Andries Gerhardus Henning is op 30 Oktober 1859 in die distrik Albert gebore. Met die stigting van die eerste gemeente van die Gereformeerde Kerk in die Kaapkolonie gedurende Januarie 1860 te Roosterhoek, distrik Albert, was hy die heel eerste baba wat gedoop is. Hy en sy eggenote woon agtereenvolgens te Janspoort, tussen Burgersdorp en Venterstad/Bethulie en die plaas Lemoenkloof in die Fauresmith distrik.

Oom Andries het sy Kerk vir meer as dertig jaar lank op die Kerkraad gedien. Hy was ‘n bekende op verskillende meerdere vergaderings en was ‘n belese en ervare man met ‘n helder begrip. Hy was ‘n vurige ondersteuner van Die Afrikaanse Patriot en ‘n

stigterslid van die Nasionale party.

Gedurende die Tweede Vryheidsoorlog het Oom Andries met die tronk kennis gemaak, omdat hy ‘n rebel was wat by een van die Vrystaatse kommando’s wat die Kaapkolonie ingeval het, aangesluit het. Na die Vrystaters teruggeval het, val hy in die hande van die Britse magte. Na drie maande is hy op borgtog van £9 000 uitgelaat, maar is later vrygespreek. Die Britse regter het dit volgens oorlewering met die woorde “behold a man” gedoen vanweë Andries se eerlikheid.

Dit is in hierdie tyd dat hulle jongste dogter gedoop is met die naam Liberta. Oom Andries was ‘n vurige vaderlander in murg en been; op elke gebied getrou ondersteun deur tant Hannie, sy vrou.

Gedurende 1906 verhuis hy en tant Hannie na die Vrystaat. Hulle was vir ‘n rukkie op Bethulie woonagtig en verhuis daarna na die distrik Fauresmith waar hulle vestig op die plaas Lemoenkloof. Hier het hulle tot met sy dood, 4 Augustus 1932 gewoon.

# Sterftes

**a2.b1.c3.d2.e2.f7.g1. Mark Henning \*Johannesburg 26-3-1934** sterf vreedsaam op Saterdag 25 September 2021 terwyl hy op sy bed gelê en na die Ryderbeker golfstoernooi gekyk het. Hy was 87 jaar en ses maande oud.



**a2.b1.c3.d2.e2.f7.g1. Mark Henning \*Johannesburg 26-3-1934 en sy lieue vrou, Sheila (gebore Macaskill). Onder is hulle in hul jonger dae in 'n vrolike bui tydens 'n spesiale funksie**



Met sy dood herdenk ons sy lewe wat vol ryk en uiteenlopende prestasies was.

Mark Henning was die hoof van St Stithians College, Randburg vanaf Julie 1969 tot Desember 1988, toe hy Nasionale Direkteur van die Onafhanklike Skoleraad geword het. Hy het in hierdie pos gedien tot Desember 1998, toe hy afgetree het. Hy was diep betrokke by die bestuur en organisering van privaatskole en die veranderinge wat sedert 1976 deur die onderwys bedeling in Suid-Afrika gespoel het.

Hy was ook betrokke by krieketadministrasie op Nasionale vlak en was Vise-President van die Suid-Afrikaanse Krieketvereniging gedurende 1977. Hy het vir baie jare in verskeie poste in Transvaal Krieket gedien.

In 1998 is die Johannesburgse Onderwyskollege se Rector Goue Medalje-toekenning aan hom toegeken vir “**sy toewyding en toegewyde diens aan die onderwys, vir sy professionaliteit en vir die goeie voorbeeld wat hy aan leerlinge en kollegas gestel het**”. Mark en sy pa is die enigste pa/seun-ontvangers van

hierdie toekenning.

Ons het ook verneem van die dood van **Maria Johanna Henning (gebore Wiesner) \*24 Oktober 1927**, vrou van a2.b1.c6.d3.e13.f5. Ernest Joseph Henning wat op 16 September 2021 in die ouderdom van 93 jaar en elf maande gesterf het.

Tannie Marie, soos almal haar geken het, is vanaf Januarie 2019 in Huis Silverjare te Petrus Steyn opgeneem. Met tyd het tannie Marie se gesondheid agteruit gegaan, maar sy was steeds positief oor die lewe gewees. Sy was 'n baie gelowige mens wat die Here met 'n passie gedien het.






Die laaste 3 dae voor haar dood het sy skielik verder agteruit gegaan en het haar maagseer begin bloei. Gelukkig kon die kinders haar groet die oggend van die 15 de September 2021 en sy is die middag van die 16de om 18:15 oorlede. Haar steffe was nie Covid-19 verwant nie.

Tant Marie se eggenoot, Ernest Henning was vir 34 jaar in die wolhandel betrokke en het vir 25 jaar op die stadsraad van Lindley gedien. Hy was onder andere voorsitter van die Bestuurskomitee, onder-burgemeester, burge-meester. Hy het gedien op die lisensieraad, die beheerraad van die Lindleyskool en was sekretaris en president van die Lindley Landbougenootskap. Hy het ook gedien op die Noord Bantoe Administrasieraad

**Maria Johanna (Marie) Henning (gebore Wiesner) \*24 Oktober 1927 wat op 16 September 2021 gesterf het**

## Tappe Henning help SA Rugbyspanne



**a2.b9.c1.d2.e7.f1.g3.h3. Willem Taljaard Stopforth Henning \*6-6-1961 of Tappe Henning, soos hy algemeen bekend staan**

Tappe Henning, 'n voormalige toetsskeidsregter van Suid-Afrika, het gedurende Oktober 2021 die Bulle en Haaie in Cardiff gehelp om die vertolking van die reëls in die Noordelike halfrond onder die knie te kry. Tappe is natuurlik a2.b9.c1.d2.e7.f1.g3.h3. Willem Taljaard Stopforth Henning \*6-6-1961 in die Henning geslagsregister.

Jake White, die Bulle se hoofafripter, het Tappe, wat die laaste paar jaar in Skotland woon en as dié rugbyland se wedstrydkommissaris dien, se hulp ingeroep.

White het Sean Everitt, die Haaie se afripter, ook uitgenooi om van Tappe se dienste in die Walliese hoofstad gebruik te maak.

Daar is na Tappe uitgereik nadat die Bulle in die eerste twee rondtes van die Verenigde Rugbykampioenskap (VRK) gesukkel het om by die blasers van die Noordelike Halfrond aan te pas.

“Ons het voor ons kom toer het, tyd saam met Suid-Afrikaanse skeidsregters deurgebring om ons voor te berei op dit wat ons hier in die noorde te wagte kon wees”, het White gesê.

“Soos dinge uitgedraai het, kon ons steeds nie behoorlik aanpas nie”.

“Ek het Tappe gevra om ons wedstryd teen Cardiff by te woon en terugvoer te gee oor dit waarop ons moet fokus.”

“Ons gebruik ons hulpbronne doeltreffend en is meer as gelukkig om Tappe se kennis met die Haaie te deel.”

Tappe het aangedui dat hy graag sy landgenote sal help en glo dat dit in die beste belang van die Verenigde Rugbykampioenskap sal wees as die Suid-Afrikaanse spanne op gelyke voet meeding wat skeidsregters betref.



**Tappe Henning besig om die Bulle se rugbyspan voor te lig oor die interpretasie van die reëls in die Noordelike Halfrond**

“Ek het die beheerliggaam van die VRK in kennis gestel dat ek die Bulle gaan bystaan. John Lacy, die Ierse skeidsregter, doen dieselfde en help die Stormers” het Tappe gesê.

“Ons aanvaar dat daar verskille is en almal is daartoe verbind om dit te oorkom. Daar is ‘n gemeenskaplike poging van alle partye om dit uit te sorteer, want daar word gewerk aan dieselfde produk en met die doel om ‘n opwindende nuwe kompetisie te vestig en dit die rugbyskouspel te maak wat dit verdien om te wees.”

Tappe gee toe dat die Suid-Afrikaanse spelers, sowel as die skeidsregters in die Noordelike Halfrond aanpassings sal moet maak.

“Dit is belangrik om begrip te hê dat die skeidsregters en afrigters weens Covid-19 nie die kans gehad het om bymekaar te kom voor die nuwe kompetisie begin het nie.”

“Daar was dus nooit ooreenstemming oor byvoorbeeld hoe die duikslae geblaas gaan word nie, of wat verwag word in die lynstane en die rolmale nie.”

“Dit gesê, is daar ooglopende uitdagings vir die Suid-Afrikaanse spanne.”

“Eerstens kry die spelers te doen met skeidsregters aan wie hulle nie gewoond is nie, soms met aksente wat moeilik is om te verstaan. Hoe die boodskap aan die spelers oorgedra word, is iets waaraan hulle nie gewoond is nie”

Tappe het sy loopbaan as skeidsregter in Pretoria, by die SA Polisiekollege begin en vinnig opgang gemaak. Hy was spoedig een van die top internasionale toets skeidsregters. Daarna is hy aangestel as Suid-Afrika se verteenwoordiger op die Internasionale Rugbyraad se komitee vir skeidsregtersake en is in 2013 aangestel as Skotland se hoof van skeidsregtersake.

## Tennis: Philip Henning weer in kollig



**a2.b7.c7.d10.e3.f1.g2.h1. Philip Henning die junior tennisspler van Bloemfontein wat nou reeds 'n paar keer vir die Suid-Afrikaanse Davisbekerspan gespeel het**

a2.b7.c7.d10.e3.f1.g2.h1. Philip Henning die junior tennisspeler van Bloemfontein wat onlangs op 'n gereelde grondslag vir die Suid-Afrikaanse Davisbekerspan begin speel het, het weer die kollig gehaal, toe hy gedurende November 2021 die sesde gekeurde Brit, Luke Johnson in die eerste rondte van 'n ITF-toernooi in Austin, Texas in die VSA geklop het.

Philip het as uitgenooide speler in dié \$25 000-toernooi met 6-4, 6-4 gewen. Hy het daarna teen die Amerikaner Nathan Ponwith te staan gekom, maar is toe uitgeskakel.

In die dubbelspel het Philip saam met sy oud-skoolmaat by Grey-kollege, Bloemfontein, Joubert Klopper die eindronde gehaal, waar hulle deur Alfredo Perez en Duarte Vale geklop is.

## Vroeë Geskiedenis van die Daniël Stephanus Tak (a2.b10)



**Die plaas Elandsdraai wat deur die Henning stamvader, Pieter Hendrik Henning in 1786 uitgelê is grens aan die Visrivier, wat op daardie stadium die grens tussen die Kolonie en die Xhosastamme was. Foto geneem vanaf die plaas**

Weens die omvang van die Henning Famileiekroniek gaan baie interessante feite vir die deursnee leser van die famileiekroniek verlore weens die feit dat die meerderheid mense net op hulle deel van die kroniek konsentreer. Dit geld veral vir mense wat nie 'n rekenaar met 'n groot skerm het nie en die Famileiekroniek net op hul selfone besigtig.

Hierdie artikel sluit aan by die artikel wat in Nuusbrief 81 van Februarie 2005 oor die plaas Elandsdraai verskyn het en konsentreer op die vroeë geskiedenis van die Daniël Stephanus tak. Die voetnootnommers wat aangedui word,



**Die oudste huis op Elandskraal. Aan die agterkant is daar later 'n groot deel aangebou (plat dak links op foto) en die dak is mettertyd met 'n sinkdak vervang. Die huis in die 20ste eeu heeltemal gemoderniseer**

kan in Afdeling 6.h. van die Fameliëkroniek geraadpleeg word.

Waar die 2005 artikel meer op die plaas, Elandskraal gekonsentreer het, probeer ons in hierdie artikel meer op die mense konsentreer.

Die Daniël Stephanus – of Cradocktak van die Henning familie is nie net die jongste nie, maar ook die kleinste tak van die nasate van Peter Henrich (Pieter Hendrik) Henning. Dit is ook die tak waarvan ons die minste gegewens kon versamel. Waar al die ander tweede en derde geslag Hennings tussen die jare 1820 en 1840 die Cradock distrik verlaat het, het Daniël Stephanus, sy seuns en talle van sy verdere nasate op

die familieplaas Elandskraal en ander naby geleë plase agtergebly. Hulle kan dus met reg die Cradock Hennings genoem word.

Al die Daniël Stephanus tak Hennings, tot diep in die twintigste eeu, was boere. Daar kan aanvaar word dat Daniël Stephanus en sy drie seuns lede van die burgerkommando's moes gewees het, wat aan al die Xhosa-oorloë van die eerste helfte van die negentiende eeu deelgeneem het. Al die plase waarop Daniël Stephanus en sy seuns geboer het, was nie ver vanaf die Visriviergrens, wat aanvanklik die skeiding tussen die Boere en die Xhosa's was.

Nadat die Xhosa's verslaan is, kon die inwoners van hierdie geweste in rus en vrede verder lewe. As gevolg van die rustige tydperk wat tussen die jare 1850 en 1899 in hierdie geweste geheers het, is bykans niks van die Daniël Stephanus tak uit hierdie tydperk bekend nie.

Hoewel Daniël Stephanus se nasate met die uitbreek van die Anglo-Boere-oorlog almal kolonialers was, kan daar duidelik gesien word dat hulle lojaliteit by hul volksgenote in die Boererepublieke gelê het. a2.b10.c6.d1. Daniël Stephanus Henning, wat as 'n Kaapse rebel aan die oorlog deelgeneem het, is byvoorbeeld deur die Britse magte gevange geneem en ter dood veroordeel - omdat hy volgens hulle oordeel as 'n eersteklas rebel hoogverraad gepleeg het. Sy vonnis is egter later na 'n £100 boete verander<sup>1</sup>.

Soos die geval met al die ander Henning takke en ander Afrikanerfamilies, moes die Daniël Stephanus tak Hennings ook gedurende die twintigste eeu hulle plase begin opsê en verstedelik. Vandag vind ons die meerderheid van hulle in die groot stede van Gauteng.

Dit is egter verstommend dat 'n gedeelte van die oorspronklike plaas, Elandskraal wat deur die stamvader, Pieter Henrik Henning uitgelê is, tot die einde van die twintigste eeu nog in besit van 'n Henning nasaat was, naamlik Johannes Jacobus



Coetzee, die seun van a2.b10.c6.d3.e1. Lucia Aletta Coetzee (gebore Henning). Hy het die plaas eers teen die einde van die twintigste eeu verkoop. Hierdie gedeelte was dus meer as 200 jaar in die besit van een familie.

Maar kom ons begin ons verhaal by stamvader Pieter Hendrik se tiende kind, Daniël Stephanus.

**a2.b10. Daniël Stephanus Henning \*Achter de Sneeuwberg, Graaff-Reinet (later Cradock-distrik) 4-3-1793, ≈9-2-1794, †Elandskraal, Achter de Sneeuwberg, Cradock 18-10-1869, xGraaff-Reinet 24-1-1813 Petronella Magdalena Blom**

Daniël Stephanus word groot op sy ouers se plaas, Elandskraal, in die wyk Achter de Sneeuwberg in die Graaff-Reinet (latere Cradock) distrik. Op sestienjarige ouderdom (dit wil sê gedurende 1809) is hy al deur die owerhede as 'n onafhanklike boer beskou, hoewel hy nog by sy ouers gewoon het.

Die opgaafrolle (belastingopgawes) van 1809<sup>2</sup> dui aan dat hy toe reeds die volgende besit het: vier aantelperde, agt aantelbeeste, 109 aantelskape en 30 aantelbokke. Die opgaafrolle van 1814<sup>3</sup> dui aan dat slegs Daniël Stephanus en sy broer Gert Frans en hul eggenotes op daardie tydstip nog by hul ouers op Elandskraal gewoon het. Hy het toe darem al 605 skape besit.

Gedurende 1819 toe oupa Pieter Hendrik Henning 79 jaar oud was, het hy opgehou boer en onder andere sy plaas Elandskraal tussen sy twee seuns Gert Frans (b7) en Daniël Stephanus (b10) verdeel. Daniël Stephanus het kort hierna ook die plaas Paardekraal bekom. Gedurende 1823, die jaar toe sy pa oorlede is, het Daniël Stephanus die volgende besit<sup>4</sup>: 4 x ryperde, 6 x aantelperde, 20 x trekosse, 45 x aantelbeeste, 1464 x skape, 41 x bokke.

2 x Hottentot mans bo 16 jaar, 4 x Hottentot seuns, 2 x Hottentot vroue bo 14 jaar, 1 x Hottentot dogter het vir hom gewerk.

Dit is dus duidelik dat Daniël Stephanus sedert 1814 sterk vooruit geboer het. Gedurende 1825 het hy ongeveer dieselfde bates as in 1823 besit. Die opgaafrolle dui die volgende aan<sup>5</sup>: 4 x saalperde, 5 x aantelperde, 16 x osse, 42 x aantelbeeste, 1500 x skape, die plase Elandskraal en Paardekraal.

2 x Hottentot mans bo 16 jaar, 3 x Hottentot seuns, 2 x Hottentot vroue bo 14 jaar het vir hom gewerk.

Anders as al sy broers en susters het Daniël Stephanus nie ook die trekklus gekry en vanaf Achter Sneeuwberg weggetrek nie. Hy en sy eggenote woon hul hele lewens hier en sterf ook hier.

Daar kan aanvaar word dat hy aan al die Xhosa-oorloë moes deelgeneem het, want sy plaas het in die gebied gelê waar al hierdie oorloë gewoed het.

Daniël Stephanus en sy vrou Petronella se eerste kind het sy pa se name plus 'n derde naam gekry – Pieter Hendrik Barend wat op 3 Desember 1813 gebore is, maar hierdie seuntjie is skynbaar as baba oorlede, want hulle derde kind was weer 'n seuntjie en hy het presies dieselfde name gekry. Hy is op 29 Augustus 1817 gebore. Daarna het Daniël en Petronella nog twee seuns en nog 'n dogter gehad. Alwyn Petrus, (vierde kind – c4) gebore 22-2-1822 het wel getrou, maar het slegs een dogter gehad, terwyl die jongste seun (c6) sy pa se name, Daniël Stephanus, gebore 29-6-1831 gekry het. Hy en sy vrou het vier seuns en 'n dogter gehad.

Met hierdie artikel gaan ons konsentreer op derde en vierde geslag nasate en dan sluit ons artikel af met lede van jonger generasies wat vir een of ander rede in die kollig gekom het.

**a2.b10.c3. Pieter Hendrik Barend Henning \*Achter de Sneeuwberg 29-8-1817, ≈Cradock 21-12-1817, †Allemanskraal, Cradock 27-3-1903, χCradock 4-11-1838 Catharina Aletta Van Straaten \*13-8-1818, †Allemanskraal, Cradock 4-4-1893, D/v Abraham Stephanus van Straaten en Catharina Aletta Grobler**

Pieter Hendrik Barend word op die plaas Elandsdraal in die wyk Achter de Sneeuwberg wat later die Cradock distrik sou word gebore. Hy bekom mettertyd die plaas Allemanskraal, 'n paar kilometers Noord van sy ouers se plaas. Hy en sy broers het skynbaar nie die trekklus, soos al hulle neefs en die meeste Oosgrensboere van daardie tyd, gehad nie, want hulle bly hulle hele lewens in daardie geweste. Daar kan aanvaar word dat Pieter Hendrik Barend, as 'n jong man aan die sesde Xhosa oorlog van 1834-1835 en die sewende Xhosa oorlog van 1846-1847 deelgeneem het, aangesien sy en sy ouers se plase nie ver vanaf die Visriviergrens, waar hierdie oorloë plaasgevind het, geleë was.

Ons beweeg nou na Klein **Daniël Stephanus Henning (b10.c6)** en sy eerste vrou, Elizabeth Johanna (gebore Marais). Hulle het ook hul eerste kind – 'n seun – na sy pa Daniël Stephanus vernoem en hierdie Daniël het in die kollig gekom. Hier is sy verhaal

**> a2.b10.c6.d1. Daniël Stephanus Henning (χ) \*Waterkloof, Cradock 12-4-1867, ≈Cradock 10-6-1867, †Messina 17-8-1953, χMiddelburg Kaap 7-7-1889 Elizabeth Margaritha Johanna Kruger \*Middelburg Kaap 1-8-1861, †Cradock 21-1-1915; χχMartha Elizabeth van der Merwe \*De Aar 3-1-1886, †Messina 17-2-1960**

Hy het gedurende die Anglo-Boere-oorlog 1899-1902 as 'n Kaapse rebel onder Genl




**Daniël Stephanus Henning  
\*12-4-1867 wat as 'n  
Kaapse rebel gevang en ter  
dood veroordeel is**

Kritzinger gedien en is op 5-9-1901 te Paardekraal saam met Kmdt Lötter krygsgevangene geneem. Omdat hy 'n Kaapse rebel was, is hy op 20-9-1901 as 'n Eersteklas Rebel ter dood veroordeel, omdat hy 'n Britse soldaat geskiet en sy wapen afgeneem het. Hierdie vonnis is egter later na £100 boete en drie jaar tronkstraf verander. Gedurende die oorlog is hy in die gevangenis te Bermuda aangehou en na die oorlog in die Tokai gevangenis. Gedurende Maart 1903 is amnestie aan hom verleen. Hy was 'n vurige volgeling van Genl Hertzog. Daniël of Danie boer later jare te Zoekmekaar, Tvl. Hy en sy twee jonger broers ( Stephanus Francois \*24-10-1870 (d2) en Pieter Barend \*14-7-1874 (d3) is met drie susters getroud<sup>1,7</sup>. Ons kon ongelukkig geen informasie van Stephanus Francois (d2) kry nie.

**> a2.b10.c6.d3. Pieter Barend Henning (χ) \*Waterkloof, Cradock 14-7-1874, ≈Cradock 13-9-1874, † Cradock 5-12-1945, χJohanna Maria Magdalena Kruger \*Cradock 1-8-1869, † Cradock 19-9-1943.**



**a2.b10.c6.d3. Pieter Barend \*Cradock 14-7-1874 en sy gesin. V.l.n.r. Daniël Stephanus Henning \*15-4-1898 (e2) met Johanna (f3) op sy arm, Miriam \* 30-3-1924 (f1), vader Pieter Barend \*17-4-1874 (b10.c6.d3.) Sittende: Pieter Barend \* 20-10-1929 (e2.f2.), Ralie (suster van Johanna), Hester (gebore van Heerden) vrou van Daniël Stephanus \* 15-4-1898 (d3.e2.), moeder Johanna (vrou van b10.c6.d3. Pieter Barend)**



**Die murasie van die tweede huis wat in 1920 op Elandskraal gebou is. Die drie reuse ou palmbome staan vandag nog voor die murasie**

Hy en sy twee ouer broers is met drie susters getroud. Hy het op die familieplaas, Elandskraal, geboer. In sy tyd is die plaas verdeel en het sy dogter, Lucy Aletta, en haar man op die gedeelte wat Bo-Elandskraal genoem was, geboer terwyl sy seun, Daniël Stephanus, op die oorblywend ou gedeelte van die plaas geboer het.


**> a2.b10.c6.d3.e1. Lucy Aletta \*Elandskraal, Cradock 28-2-1894, †Cradock 30-4-1945, γFrederik Johanns Coetzee \*3-1-1888**

Sy was die laaste Henning wat op die gedeelte, Bo-Elandskraal, geboer het. Haar seun, Johannes Jacobus Coetzee en sy eggenote Maureen (gebore Potgieter), het na haar dood nog daar geboer en toe hy te oud geword het, het hy die plaas verkoop.

**> a2.b10.c6.d3.e2. Daniël Stephanus Henning \*Elandskraal, Cradock 15-4-1898, ≈1-5-1898, †Graaff-Reinet 24-3-1981, γHester Maria van Heerden \*Cradock 26-5-1899, †Graaff-Reinet 27-6-1989.**

Hy was die laaste Henning wat op die ou gedeelte van Elandskraal geboer het. Hy het die tweede opstal op die plaas in 1920 opgerig. Na 'n geweldige droogte kon hy nie meer die mas opkom nie en was genoodsaak om die plaas te verkoop. Elandskraal was tot op daardie stadium vir meer as 200 jaar in besit van die nasate van Peter Henrich Henning.

**> a2.b10.c6.d3.e2.f2. Pieter Barend Henning \*Cradock 20-10-1929, †Pretoria 25-1-2016, γPort Elizabeth 21-11-1956 Sarah Louisa Ferreira \*9-3-1921, D/v Paul Jacobus Ferreira en sy vrou Annie Louisa, γJohanna Maria Botes \* 6-2-1937.**



**Peperbome groei baie stadig en word baie oud. Verskeie peperbome wat duidelik baie oud is, staan op die werf van die plaas Elandskraal. Mens kan sien dat die linkerkantste boom baie oud moet wees, omdat daar selfs 'n nuwe boom uit die ou boom ontstaan het. Daar word vermoed dat hierdie boom 200 jaar of ouer moet wees en dus deur die stamvader, Pieter Hendrik of een van sy seuns geplant moes gewees het**

Pieter het in die tweede huis wat sy pa in 1920 op Elandskraal gebou het, groot geword. Nadat hy gematrikuleer het, het Pieter in Cradock by die Landbank as klerk begin werk, maar soos die gebruik by banke is hy gereeld na verskillende takke van die bank verplaas. Hy was dus oor baie jare op verskillende dorpe in die land woonagtig.

> a2.b10.c6.d4. **Johannes Petrus Henning (χ) \*Waterkloof, Cradock 7-7-1875, ≈5-9-1875, †Pretoria, χCradock 28-10-1895 Anna Susanna Du Rand \*Somerset-Oos Mrt 1877, †Johannesburg 2-5-1938, D/v Bart Du Rand en sy vrou Anna, †; χχHester Susanna Catharina Botha**

Gedurende die Anglo-Boere-oorlog het hy op die plaas Paardekraal, Cradock gewoon. Hy is op 18 September 1901 op sy plaas krygsgevangene geneem en omdat hy as 'n Eersteklas Rebel beskou was, is hy op 16 Desember 1901 ter dood veroordeel weens wapendiefstal omdat hy 'n Britse soldaat se wapen afgeneem het. Die vonnis is egter na drie jaar tronkstraf verminder. Na die oorlog is amnestie gedurende Maart 1903 aan hom verleen.<sup>8</sup>

**Ander nasate van die Cradock Hennings waarvan ons wil vertel, was:**

**a2.b10.c6.d1.e3. Johannes Jacob Henning (χ) \*Elandskraal, Cradock 15-1-1907, χPretoria 16-7-1940 Heila Magdalena (gebore Hart) \*Pretoria 10-12-1918**

Hy word groot op die plaas Spitskopvlei, distrik Cradock. Hy sluit gedurende 1925 by die Suid-Afrikaanse Berede Skutters aan, dog word nege maande later na die SA Polisie oorgeplaas. Hy dien 40 jaar lank in die Polisie. Gedurende die Tweede Wêreldoorlog doen hy diens in Noord Afrika en word by Tobruk krygsgevangene geneem en te Italië en Duitsland gevange gehou.

Hy het by 'n bank in Cradock begin werk. Omdat hy laat in sy lewe eers getroud is, is hy baie rondverplaas om aflosdiens te verrig. Hy het op 32 plekke diens gedoen. Hy het gedurende 1963 die Grens afdeling van die SA Polisie tot stand gebring en het uiteindelik as die afdelingskommissaris, Port Elizabeth afgetree.



**a2.b10.c6.d1.e1.f2. Daniël Stephanus Henning \*Soekmekaar 25-4-1924, † Pretoria 25-3-1997, χPotgietersrus 7-7-1951 Wilhelmina Johanna Cornelia Beytell \*Potgietersrus 9-8-1931, †Ottosdal 25-11-1980**

Hy was tot en met sy aftrede gedurende 1984 'n onderwyser en het agtereenvolgens by Kommando Laerskool, Brakpan, Phalaborwa Laerskool en Ottosdal Laerskool skoolgehou.

Gedurende die tyd toe hy 'n onderwyser by die Kommando Laerskool in Brakpan was, was Bondsekretaris, Olivier Henning self 'n skoolier by hierdie laerskool. Ek onthou hy was 'n kort, blonde man gewees. Selfs as 'n kind het ek altyd gewonder of ons enigsins op een of ander manier familie was. Nadat ek hom met my navorsing geïdentifiseer het, kon ek dus presies bepaal waar hy inpas.

Ek is so jammer dat ek destyds nie met hom familiesake gesels het nie, maar hy het nooit vir my skoolgehou nie en ek was nie so voorbarig om sommer met 'n onderwyser oor familiesake te gaan gesels het nie.

## **Jonger nasate van die Cradock Henning wat die oog vang is die volgende**

**a2.b10.c6.d3.e3.f2.g3. Eugene Johannes Henning \*Beaufort-Wes 23-5-1977, χImke Lombard \*Vredenburg 10-3-1977, D/v Pieter Zacharias Lombard \*31-7-1948 en Elsa Potgieter \*31-3-1948.**



As 'n skoolier aan die Pietersburg Hoërskool presteer Eugene goed in redenaarskompetisies waar hy vir etlike jare die provinsiale of nasionale kompetisies wen. Hy was ook Onder-Hoofseun van die Pietersburg Hoërskool. Na matriek studeer hy in die Regte aan die Universiteit van Stellenbosch en word vir die jaar 2001 as Ondervoorsitter van die Studenteraad verkies. Hy verwerf uiteindelik die grade B Com, LLB en MBA en praktiseer as prokureur waar hy as regsadviseur vir Bidvest in die VK dien. Na sy terugkeer na Suid-Afrika werk hy as regsadviseur in die finansiële sektor en word aangestel as die Hoof-Uitvoerende Beampte van beroepsrugby se "My Players" organisasie.

**a2.b10.c6.d3.e3.f2.g3. Eugene Johannes Henning \*Beaufort-Wes 23-5-1977. Ongelukkig het ons nie 'n nuwer foto van hom nie**

**a2.b10.c3.d1.e1.f1.g1.h3.i2. Pieter Hendrik Barend Henning \*Pretoria 19-4-1971, †Hazyview 15-6-1993**

Hy is op 27 weke gebore met 'n geboortegewig van 1 lb 12 onse (28 onse) en is een van die kleinste babas wat in Suid-Afrika gebore is en bly lewe het. Hy het ontwikkel in 'n pragtige gesonde en normale seun.



Hy sluit by die SA Polisie aan. Hy sterf in die ouderdom van 22-jaar terwyl hy op diens was. Hy was op daardie stadium 'n sersant. Gedurende die vroeë negentiger jare (1993) het APLA, die gewapende vleuel van die Pan Africanist Congress (PAC), talle boere in Noord- en Oos Transvaal op hulle plase aangeval en vermoor.

As voorsorgmaatreël is verskeie polisiemanne op plase geplaas om die boere te beskerm. Hy is in 'n piesangplantasie op die plaas Vaspan, in die distrik Hazyview deur een van hierdie terroriste in 'n lokval gelei en vermoor.

**Pieter Hendrik Barend Henning \*19-4-1971 wat deur PAC terroriste in 'n lokval gelei en vermoor is**

## **b7.c8.d8.e1.f2.g2.h2 Anél Henning Presteer**

Anél Henning, gebore 22 Augustus 1989 was van kleins af baie lief om te teken en het reeds sedert laerskool 'n besonderse talent gehad vir die kunste en mense was verstom oor die fynste besonderhede in haar kunswerke.

Op hoërskool het sy kuns as vak geneem, maar terseldertyd wiskunde en wetenskap op hoër graad. Anel het vyf onderskeidings in matriek verwerf aan die Hoërskool Eldoraigne (2007), onder andere in kuns, wiskunde en wetenskap.

Deure was oop in alle rigtings en sy het gekies om 'n 4 jaar graad in Visuele Kunste by die Universiteit van Pretoria (TUKS) te doen.

In die vierde - en finale jaar van haar kuns studies skryf sy in vir aandklasse by Open Window om onder andere 'n sertifikaat in 3D Studio Max te verwerf.

In Oktober van die jaar wat sy haar graad voltooi het, kry sy werk by 5DT (5<sup>th</sup> Dimension Technologies) wat opleiding-simuleerders bou vir die bosbou, mynbou en lugvaart bedrywe en pas haar talente toe met die ontwerp van 3D modelle



**Anél Henning \*22-8-1989 staan met haar B Sc (Cum Laude) graadsertifikaat wat sy by UNISA verwerf het**

van die masjienerie van die onderskeie bedrywe en skep 3D omgewings-tonele wat die sagteware ontwikkelaars en ingenieurs gebruik om die simuleerders te bou.

Sommer gou prikkel die sagteware ontwikkelingskant van die simuleerders haar en sy begin deelyds by UNISA studeer. Anel slaag die graad BSc Rekenaar Wetenskap Cum Laude na 4 en 'n half jaar se toewyding, harde werk en baie selfdissipline in Julie 2021.

Haar pa, Stanley, het haar en haar boetie (Heinrich) altyd uitgedaag om slimmer, sterker en beter as hy te word. Dit beteken mos ontwikkeling en vooruitgang. Toe sy haar tweede graad slaag was haar woorde aan hom: "Pa, twee grade is sekerlik beter as pa se Meestersgraad of hoe?!"

Anel het balans in haar lewe behou deur nie net akademies te presteer nie. Sy het ook in 2018 die Knysna marathon en die Wild Coast Wildrun saam met haar ma voltooi.

Sy en haar lewensmaat is nou albei sagteware ontwikkelaars by 5DT en het besluit om vanaf Januarie 2022 permanent Plettenberg Baai toe te verhuis. Een van die voordele van die sagteware ontwikkeling is dat moderne tegnologie dit moontlik maak om van enige plek in die wêreld te kan werk.

Sy beskou haarself as baie bevoorreg en trots daarop om 'n Henning te wees.



## Geldsake

Die Henning Familiebond oorleef op vrywillige donasies wat ons van welmenende lede ontvang. Ons kan met trots berig dat sedert die familiebond in 1984 gestig is, ons nog altyd al ons verpligtinge kon nakom en die familiebond selfs in die posisie was om bydraes te maak aan kultuurorganisasies wat ook na die kultuur en geskiedenis van die Henning families omsien, soos die Erfenisstigting, die Oorlogsmuseum van die Boererepublieke en die Voortrekkermonument.

Baie dankie aan ondergemelde lede wat gereeld maandeliks per debietorder 'n bydrae vir die familiebond aanstuur. Dit is van onskatbare waarde:

**Jan Hendrik Henning van Glenstantia, Pretoria, Mauritz Martin Henning van Theresapark, Pretoria-Noord, mev Runa (R T) van Straaten van Pretoriuspark, Pretoria, die 92-jarige Pastoor Antonie Henning van Daspoort, Pretoria en Gert Hendrik Frans Henning en sy vrou, Grietha van Bethlehem.**



Dan het die volgende persone oor die afgelope drie maande ook waardevolle bydraes gelewer waarvoor ons baie dankbaar is:

- Nicolaas (Nico) Henning van Grahamstad – R500.00
- Tjaart Johannes Henning (Tjaart) en sy vrou van Sinoville, Pretoria – R1 000.00
- Gert Hendrik Frans Henning, vermoedelik van Bloemfontein – R1 000.00
- Gert Frans Dempsey Henning en sy vrou van Petrusburg – R300.00
- Theunis Philippus (Flip) Henning en vrou, Tania van Ermelo - R200.00

- Johan Henning – R200.00. Ongelukkig weet ons nie watter Johan Henning dit is nie, want Johan is die mees algemene noemnaam onder die Henning families
- Ellie Henning van Noorsekloof – R200.00
- Jan Johannes Petrus van Lyttelton-Manor – R200.00
- Linda van Tonder (gebore Henning) van Ferndale – R200.00

**Alle bydraes word verwelkom, want dit wys vir ons dat hierdie lede waardering het vir die werk wat die familiebond doen.**

**Die bank besonderhede van die Henning Familiebond is as volg:**

**FNB, Villiersdorp (tak 200 712); Rekening nr 6265 7601 483. Dit is 'n lopend rekening.**

**Gebruik asseblief u lidnommer of voorletters en van (indien moontlik volle voorname) as verwysing wie die deposito gemaak het.**

## Henning Aandenkings

Ons voorraad Henning aandenkings wat ons teen kosprys verkoop, word nou vinnig minder en ons beplan nie om weer te bestel nie. Ons het nog net die volgende items oor:

- Goue teelepels – 30 @ R50.00 elk
- Lapelwapens – 1 @ R30.00 elk
- Silwer suikerlepels – 1 @ R40.00 elk
- Silwer teelepels – 1 @ R35.00 elk
- Silwer koekvurkies 3 @ R35.00 elk
- Skryfblokke met Henning wapen (50 bladsye) 20 @ R30.00 elk
- Henning Famiekroniek op CD – R120.00 elk. Word eers gebrand wanneer u bestel en ons seker gemaak het dat u hele familie se gegewens op die CD verskyn

Indien u belangstel, kontak ons eers per E-Pos by [olie4@henning.org](mailto:olie4@henning.org) of selfoon of whatsapp by 082 355 3801 wat die versendingskoste sal beloop.